



Podrška Općine Jajce u implementaciji 16 novih projekata

Bespovratna sredstva kao poticaj zapošljavanja mladih

Održane Pozorišne/Kazališne igre BiH u Jajcu

BESPOVRATNA SREDSTVA KAO POTICAJ ZAPOŠLJAVANJA MLADIH



Općina Jajce potpisala je deset ugovora o dodjeli bespovratnih sredstava namijenjenih poticaju zapošljavanja mladih iz budžeta Općine Jajce ukupne vrijednosti 67.300 KM.

Ovo je treća godina za redom kako se izdvajaju sredstva za ovakvu vrstu poticaja u zapošljavanju mladih.

Amina Mrkonja, Marin Ljubičić, Admin Plivac, Brankica Miketa, Kristina Bagarić, Arnela Ganibegović, Merim Lizalović, Selmir Duranović, Tomislav

Brnjak i Marko Bogić i Goran

Savalina mladi su ljudi čije su poslovne ideje izabrane kao uspješne na Javnom konkursu za izbor uspješnih kandidata za samozapošljavanje mladih.

Proizvodnja gotovih proizvoda od tekstila, Hans Music Production, Eko prijevoz fijakerom-kočijom, Iznajmljivanje šatora i opreme, Frizerski salon MAGIC LOOK, Gift shop-oslikavanje slika po raznim predmetima, Fitness studio Pliva, Herba Medica Tea, Sportsko-rekreacijski centar Kinezis i Taxi obrt poslovne su ideje mladih Jajčana koje će biti realizirane u narednom periodu.

Općina Jajce dodijelila je bespovratna sredstva u vidu finansijske pomoći za pokretanje biznisa. Realizacija projekta podrazumijeva period od dvanaest mjeseci.

Želja je da ovakvu vrstu poticaja, koji se, u zavisnosti od ideje, kreće do 10.000 KM, narednih godina koristi i veći broj mladih.

PODRŠKA OPĆINE JAJCE U IMPLEMENTACIJI 16 NOVIH PROJEKATA



Načelnik Općine Jajce Edin Hozan potpisao je ugovore s predstavnicima NVO i omladinskih organizacija s područja općine Jajce čiji projekti su dobili podršku Općine Jajce u 2018. godini.

Načelnik Hozan zahvalio se nevladinim organizacijama za pokrenute aktivnosti i društveno koristan rad kojim se bave u razvoju lokalne zajednice.

Ukupna dodijeljena sredstava za mlade i NVO iznose 24.000 KM, a implementiraće se kroz šesnaest različitih projekata.

Sufinansiranje projekata za NVO i mlade za 2018. godinu:

UG „Nada“ Jajce – „Zdravlje je bogatstvo“, PTSP-TRAUMA Jajce – projekt „Zagrli svoje zdravlje“, Rafting klub Jajce – projekt „Vrbaska eko-rafting regata 2018“, Atletski klub „Vodopad“ Jajce – „Nabavka pijeska za jamu“, Udruženje žena „Laste“ Bistrica, Jajce – „Sačuvajmo od zaborava“, Klub „Prijatelji prirode“ Jajce – „Ekološko pokazne staze Jajce-Hum-Dnolučka planina“, Udruženje građana „Vodopad ljubavi“ Jajce – „Našoj djeci-radionica za djecu i mlade s poteškoćama u razvoju“, Auto klub „Jajce“ Jajce – „Prometno-preventivne akcije“, KUD „Jajce“ Jajce – „Ej Trebeviću – visok teferiću“, Udruženje građana za opću saradnju „AB OVO“ Jajce – „Uređenje i sanacija Partizanskih spomen-obilježja na teritoriji općine Jajce“, KUD „Stari grad Jajce“ Jajce – IX Međunarodni festival „Dani mladosti Jajce 2018“, Omladinski klub „DIJAMANT“ – „Dani našeg povratka 2018“, Asocijacija mladih MIZ Jajce „Tajib Okić“ – „Sedmica čistoće u mom džematu“, UG Omladinski centar Jajce – „Jednaka prilika za sve“, Novi most International – „Kreativno druženje“ i Družina izviđača „Gola planina“ Jajce – „Edukativno-rekreacijski kamp za djecu i mlade 2018“.

PRIPRAVNIČKI STAŽ ZA SEDAM NOVIH VOLONTERA



Sedam novih volontera otpočelo je s obavljanjem pripravničkog staža u okviru projekta zapošljavanja volontera Općine Jajce.

Ugovore o radu s volonterima, koji će u narednih dvanaest mjeseci, u općinskim službama, javnim preduzećima i ustanovama sticati pripravnički staž potpisao je načelnik Općine Jajce Edin Hozan.

U posljednjih osam godina Općina Jajce je, u okviru projekata zapošljavanja volontera, uposlila preko 120 mladih s visokom stručnom spremom, višom školskom spremom i lica koja su završila studij po

bolonjskom programu.

Riječ je o nezaposlenim mladim ljudima s visokom i višom stručnom spremom koji su se nalazili na evidenciji Biroa za zapošljavanje. Volonteri će biti raspoređeni u općinskim službama, javnim ustanovama i preduzećima u zavisnosti od profesije, a projekat finansira Općina Jajce.

Po završetku volonterskog rada, koji traje godinu dana, svi uposleni po ovom osnovu stižu prvo polaganja ispita općeg znanja, odnosno državnog ispita, što otvara mogućnost prijavljivanja na konkurse s jednogodišnjim radnim iskustvom.

NOVIH 30 KORISNIKA BESPOVRATNIH SREDSTAVA KAO POTICAJ SAMOZAPOŠLJAVANJU



Projekat sufinansiranja samozapošljavanja u oblasti poljoprivrede i obrta Općina Jajce nastavila je i u 2018. godini. Riječ je o finansijskoj podršci na bespovratnoj osnovi za samozapošljavanje nezaposlenih lica.

U predhodnih pet godina Općina Jajce izdvojila je kroz ovaj projekat više od 500.000 KM i podržala više od 130 korisnika.

Ugovori o sufinansiranju samozapošljavanja u 2018. godini potpisani su sa 30 korisnika.

Ovo je šesta godina da Općina Jajce na ovaj način pomaže pokretanje malih obrta i daje podršku samozapošljavanju u poljoprivredi. Vrijednost svakog pojedinačnog ugovora iznosi 3.500 KM za samozapošljavanje u poljoprivredi i 5.000 KM za sufinansiranje u oblasti obrta. Program ima za cilj potporu poljoprivredi i ruralnom razvoju kao i razvoju zanatstva i malih preduzeća, a ova sredstva predstavljaju stimulaciju korisniku za uspostavljanje i obavljanje samostalne djelatnosti, vodeći računa i o licima koja se nalaze pred ostvarivanjem prava na penzionisanje, ali i smanjenju broja lica na evidenciji Biroa za zapošljavanje. Također, želja je pomoći i mladima u početnim koracima razvoja obrta i poljoprivredne proizvodnje.

400.000 KM ZA POKRETANJE BIZNISA NEZAPOSLENIH MLADIH U OSAM BH GRADOVA – JAJCE DIO PROJEKTA

Nezaposleni mladi iz osam bosanskohercegovačkih gradova i općina dobit će sredstva za pokretanje vlastitog biznisa kroz Preduzetnički fond za mlade koji će sa 400.000 KM finansirati Institut za razvoj mladih KULT i jedinice lokalne samouprave čime će biti osigurana sredstava za pokretanje biznisa za oko 100 mladih iz osam BH gradova.

Ugovori između Instituta i jedinica lokalne samouprave koje će biti dio programa „Preduzetnički fond za mlade“ potpisani su, a tokom septembra i oktobra bit će raspisani javni pozivi na koje će za dodjelu sredstava moći aplicirati mladi iz Cazina, Trebinja, Općine Centar Sarajevo, Jajca, Modriče, Novog Travnika, Općine Stari Grad Sarajevo i Teslića.

-Ovo je jedna od mjera koja je naš odgovor na problem nezaposlenosti mladih s kojim se suočava cijela zemlja. Podršku mladima pružali smo i ranije i radit ćemo to i u budućnosti, a vjerujemo da zainteresovanost mladih za učestvovanje u ovom programu neće izostati, istakao je tokom ceremonije potpisivanja ugovora načelnik Općine Jajce Edin Hozan.



Institut za razvoj mladih KULT uz podršku Ambasade Kraljevine Švedske u BiH izdvojit će ukupno 200.000,00 KM za implementaciju projekta u osam lokalnih zajednica, a jednak iznos izdvojit će i jedinice lokalne samouprave.

Ovo je uspješan model rješavanja nezaposlenosti mladih u BiH, model gdje općine učestvuju 50 % sredstava, a 50 % KULT s ambasadom Švedske koja je partner projekta. Ono što je značajno jeste da će mladim poduzetnicima biti pružena i stručna i mentorska podrška tokom prve godine poslovanja.



PREDSTAVA MARKA MISIRAČE 'SABIRNI CENTAR' PROGLAŠENA NAJBOLJOM



Predstava „Sabirni centar”, koju je prema tekstu Dušana Kovačevića, nastalom početkom osamdesetih godina prošlog vijeka, čiju režiraju potpisuje Marko Misirača, osvojila je prvu nagradu stručnog žirija na 37. Pozorišnim igrama BiH u Jajcu.

Predstava je nastala u koprodukciji NPRS-a i Pozorišta Prijedor.

Tako je odlučio stručni žiri u sastavu: Strajo Krsmanović, Irina Dobnik i Adnan Lugonjić, dodjelivši nagradu za najbolju režiju Dini Mustafiću za predstavu „Sve se preživi, osim smrt“ Ljubice Ostojić u izvedbi Narodnog pozorišta Sarajevo.

Istoj predstavi pripale su dvije od pet glumačkih nagrada, Aleksandar Seksan dobio je nagradu za najboljeg glumca za ulogu Edina, te Kaća Dorić za ulogu gospođe mame. Preostale tri nagrade za najbolja glumačka ostvarenja pripale su: Remiri Osmanović, Slavenu Knezoviću i Robertu Peharu.

Za najbolju predstavu prema mišljenju žirija publike proglašena je predstava „Hamlet u selu Mrduša Donja”, HNK Mostar.

Nagradu za najbolji dramski tekst savremenog autora dobila je Ljubica Ostojić, dok je Ivan Velisavljenović dobio za dramaturški rad na predstavi „Sabirni centar“.

Ovogodišnje 37. Pozorišne/Kazališne igre BiH u Jajcu ponudile su u svom takmičarskom programu, po izboru selektora Almira Bašovića, šest od sedam predstava iz Sarajeva, Prijedora, Tuzle i Banje Luke, Mostara, a u bogatom pratećem program priređene su izložbe, amaterske predstave te promocije knjiga i časopisa.

Zavjesa na Igre spuštена je vraćanjem „Ključeva grada” općinskom načelniku Edinu Hozanu koje je predala dramatičarka i rediteljka Dubravka Zrnčić-Kulenović.

U čast nagrađenih održan je i koncert Vesne Pisarović uz italijanski Jazz trio.

ODRŽAN 4. MEĐUNARODNI FESTIVAL DUHAČKIH ORKESTARA- LIMENIH GLAZBI

U kraljevskom gradu Jajcu održan je 4. Međunarodni festival duhačkih orkestara-limernih glazbi. Domaćin festivala je Gradski duhački orkestar/limena glazba Jajce, a u programu su učestvovali orkestri: Gradski orkestar Stolac, Limena glazba Konjuh Živinice, Duvački orkestar – KUD Željezara Zenica, Puhački – duvački orkestar Travnik, te gosti iz Hrvatske – Gradska glazba Virovitica.

Nakon defilea kroz centar grada održan je koncert na platou ispred Doma kulture Jajce na kojem je prisustvovao veći broj građana.



Kao najstarija, aktivna, kulturna institucija u gradu Gradski duhački orkestar/limena glazba Jajce jedna od organizacija koja okuplja ljude svih dobnih, socijalnih, spolnih i etničkih grupa i na bazi amaterizma i volentarizima univerzalnim jezikom nota razvija i jača duh saradnje i tolerancije i oplemenjuje i širi kulturni habitus svojih članova i šire zajednice.

Jajački orkestar limene glazbe nastao u vrijeme osnivanja Vatrogasnog društva, kao muzička sekcija društva, stoga je gotovo nemoguće odvojeno pisati bilo o vatrogasnoj četi, bilo o orkestru limene glazbe, jer su većinu vremena činili ih isti članovi i većinu vremena se nalazili pod istim krovom.

Sačuvana matična knjiga društva svjedoči, upisano na njemačkom jeziku, da je osnovano 1897. godine, 19 godina nakon austrougarske okupacije Bosne i Hercegovine.

Pokrovitelji ovog festivala je Općina Jajce.

ISPRAĆENI UČESNICI 14. BIKIKLISTIČKOG MARATONA BIHAĆ – SREBRENICA



Iz Jajca ispraćeni učesnici 14. Biciklističkog maratona Bihać –Srebrenica. Preko 300 biciklista, učesnika maratona, pozdravio je načelnik Općine Jajce Edin Hozan, odajući zahvalnost svim učesnicima u ovoj humanoj misiji, uz želje za uspješan put i sretan dolazak na konačno odredište.

Na gostoprimstvu u ime učesnika zahvalio se predsjednik kluba ekstremnih sportova „Limit“ Ermin Lipovača Lipa naglašavajući da i

na ovaj način, suosjećajući s patnjom i bolom preživjelih Srebreničana, učesnici biciklističkog maratona odaju počast svim žrtvama genocida u BiH, s naglaskom na Srebrenicu, noseći parolu tokom cijele trase „DA SE NIKAD NE ZABORAVI I NE PONOVI“.


GRUPA OD 50 JAJČANA U KOLONI MARŠA MIRA

Grupa od 50 Jajčana u koloni Marša mira Srebrenica 2018. godine u kojem i ove godine učestvuje više hiljada učesnika iz cijelog svijeta.

Načelnik Općine Jajce Edin Hozan ispratio je Jajčane koji su otputovali do Nezuka odakle su krenuli na trodnevni put dug 110 kilometara do Potočara i poželio im sretan put, te izrazio svoje poštovanje svim učesnicima Marša mira.





OTKAZANI SKOKOVI S VODOPADA



Ovogodišnji, 5. Međunarodni takmičarski skokovi s vodopada nisu održani iz sigurnosnih razloga po skakače. Iz tehničkih razloga nije bilo moguće izvršiti neophodne pripreme na Vodopadu da bi se mogla garantovati sigurnost skakačima te je Organizacioni odbor ovogodišnjih skokova odlučio da se skokovi ne održe.

U narednom periodu će se, u saradnji sa drugim nadležnim institucijama, uraditi sve kako bi se za narednu godinu osigurali uslovi za održavanje ove značajne manifestacije.



KRALJ DOBRIH CIJENA I U JAJCU



Kompanija “Bingo” d.o.o. Tuzla u augustu je otvorila svoju 191. poslovnu jedinicu, ovoga puta u Jajcu. Na 13 000 metara kvadratnih, s prelijepim pogledom iz restorana na tvrđavu, ovo je jedan od najljepših objekata “Binga”.

Vrpcu su presjekli Edin Hozan načelnik Općine Jajce i predstavnici “Binga”, a ispred Centra je priređen prigodan zabavni program. Posjetioce su zabavljali Gradski duhački orkestar/Limena glazba Jajce, Plesna grupa Zumba, te folklorni ansambli KUD Stari grad Jajce i KUD „Jajce“.

Centar ima tri etaže (podzemna garaža, prizemlje s hipermarketom prehrane i poslovnim prostorima, te sprat s hipermarketom neprehrane i restoran s igraonicom) i u svom asortimanu ima bogatu ponudu prehrane, tekstila, kućnog tekstila, tehnike i namještaja.

Restoran sa 300 mjesta i veliku terasu s pogledom na rezidenciju bosanskohercegovačkih kraljeva, zasigurno je jedan od najljepših ugostiteljskih objekata u Jajcu.

Posebno je značajno to što je ovaj Centar uposlio blizu 100 novih radnika.

INICIJATIVE ZA ČIST VRBAS, TRI EKO-REGATE



Rafting klub „Kanjon“ u saradnji s Rafting klubom „Jajce“, pripadnicima Oružanih snaga BiH, predstavnicima lokalnih zajednica, mještanima i kompanijom Coca-Cola HBC B-H, nastavili i ove godine sa aktivnostima Inicijative „Čist Vrbas“.

Projekt se realizuje uz podršku kompanije Coca-Cola HBC B-H d.o.o Sarajevo, koja je već osmu godinu jedan od glavnih partnera Inicijative „Čist Vrbas“ te s ostalim partnerima daje doprinos očuvanju Vrbasa i jačanju svijesti o značaju zaštite voda i odgovornog

upravljanja vodama.

Osim korita rijeke Vrbas i ove godine se čistilo korito rijeke Plive. Time se šalje jasna poruka da i rijeke u slivu Vrbasa moraju biti očišćene jer bez čiste Plive sigurno nema ni čistog Vrbasa. Podsjećamo da se aktivnosti u okviru Inicijative za Čist Vrbas realizuju u duhu Povelje za čist Vrbas koju su u maju 2013. godine, u Donjem Vakufu, osim gradonačelnika i načelnika lokalnih zajednica u slivu Vrbasa, potpisali i predstavnici resornih ministarstava oba entiteta, Fond za zaštitu okoliša Federacije BiH, Fond za zaštitu okoline i energetska efikasnost Republike Srpske te partneri projekta kompanija Coca-Cola HBC B-H d.o.o. Sarajevo, Razvojni program Ujedinjenih nacija u Bosni i Hercegovini (UNDP) i Vlada Japana.

USPJEŠNO ZAVRŠENA ‘INVAZIJA LJUBAVI NA JAJCE’

Volonteri nevladine humanitarne organizacije ADRA i projekta “Let’s Do It” te članovi Jajačkog COD-a uspješno su okončali projekt “Invazija ljubavi na Jajce”.

Cilj projekta, koji je trajao sedam dana, bio je promovisanje mira, suživota, ljubavi, podrške i zajedništva.

Pjevali su, pozdravljali i širili pozitivnu energiju na građane. Šetnjom su obilježili kraj boravka u Jajcu s ciljem da ono što su radili prethodnih dana ostane u sjećanju građanima Jajca.

- Željeli smo da građani nauče poštovati, razumijevati, dijeliti sreću i ljubav, jer to su još jedine stvari koje nas mogu kreirati kao sretne stanovnike naše domovine. Pokazali smo kako suživot i različitost mogu pozitivno dominirati u mnogim bh gradovima – poručili su organizatori projekta.




Različite aktivnosti

Vrijedni volonteri radili su na različitim aktivnostima, onima koje će ostati u sjećanju, kako njima, tako i svima onima koji su pratili ovaj projekt. Tokom boravka u Jajcu posjetili su radnike komunalnog preduzeća i uručili im poklone zahvalnosti. Jedna grupa volontera posjetila je socijalno ugroženu porodicu u Jajcu te je obradovala druženjem i poklonima sa željom pokazati im da nisu manje važni i da nisu zaboravljeni.



PISMA GRAĐANA



Iako lokalna uprava ulaže velike napore da osigura udoban i siguran život svojih građana realizirajući različite projekte, one od velike važnosti za osiguranje životnih potreba, preko onih koji čine naše bogatstvo kroz kulturne i sportske projekte, teško je zadovoljiti i sve ukuse i sve potrebe. Zaboravljajući na druge, vrlo često mislimo samo na sebe, pa tako i smatramo da je nešto završiti „kod nas“ i „u nas“, najvažnije. Nama, lokalnoj upravi grad Jajce i svi njegovi stanovnici su na prvom mjestu. Svjesni smo da ne možemo u isto vrijeme biti na svim mjestima i podjednako ugađati svima. Trudimo se, a kada taj trud vi prepoznate, onda smo posebno sretni, jer vrlo često svi mi spremni smo kritikovati, dok pohvale izostaju. A ne treba ih se stidjeti, ni kritika ni pohvala. One nam određuju pravac i daju podršku.

Danas vam prenosimo pismo zahvalnosti koje je stiglo u Kabinet Općinskog načelnika potkraj maja. Dugo smo razmišljali da li ga pokazati javnosti. Danas smo ipak odlučili s vama podijeliti riječi koje u pismu piše gospođa Borka Kovačević:

„Zovem se Borka Kovačević iz ulice Bosanska 22, a razlog mog obraćanja Vam lično je: Naime, ja sam sinoć doputovala u stan i prvo što sam zapazila je asfaltiranje moje (slepe ulice), bila sam oduševljena tim. Zato želim da Vam se zahvalim u ime stanara te ulice, te Ivanke Lovrić i u svoje lično ime. A ne samo to, jutros vidim kako je naš grad dobio novo ruho i šta je sve urađeno, pa pišem ovo sve od zadovoljstva i radosti. Ponosna sam i volim svoj grad, a Vama želim puno sreće i zdravlja, takođe i Vašoj porodici!

S velikim poštovanjem i hvala za sve!“

GRADOVI PARTNERI

PIACENZA - Italija <http://www.comune.piacenza.it/>

ALAÇATI – Turska

HALLSBERG – Švedska <http://www.hallsberg.se/>

OTTENSHEIM – Austrija <http://www.ottensheim.ooe.gv.at/system/web/default.aspx>

VIROVITICA – Hrvatska <http://www.virovitica.hr/>

ZENICA – BiH <http://www.zenica.ba/>

TOMISLAVGRAD BiH - <http://www.tomislavgrad.gov.ba>

SZEKSZARD - Mađarska - <http://szekszard.hu/>

KUTNÁ HORA - Češka - <http://www.kutnahora.cz/>

BILTEN OPĆINE JAJCE

Općina Jajce u saradnji s nezavisnim portalom Jajce Online priprema mjesečni Informativni bilten Općine Jajce koji ćete u elektronskoj formi moći prelistati svaki mjesec.

U Biltenu će biti sumirane mjesečne aktivnosti, tekstovi i fotografije koje ste možda preskočili pročitati, a zaslužuju Vašu pažnju.

Također, u Biltenu ćemo najaviti i događaje za naredni mjesec. Pred vama je dvanaesto izdanje Informativnog biltena Općine Jajce.



August 2018.